




In domënia ai 4 de mà él gnü sughé la setima partida de campionat de 3^a categoria por la squadra da La Val. Sughé él gnü te óiasa cuntra la squadra da Gais. La reaziun do la pordüda dl'ultim fin dl'edma é stada positiva, la squadra lascia udëi na bela prestaziun y davagna la partida cun le resultat de 2 a 1.

Chësta devënta é dessigü stada de gran importanza por la squadra da La Val, che resta insciö al secundo post de tlassifica cun 43 punc y le distach dales scuadres ia dedô vëgn trës maiù. La temperatöra cialdina y le bel tëmp ti à fat da cornîsc ala partida. Te chësta partida é Adrian che surantôl le compit de verdaporta, a gauja dl'asënza di atri dui portiers.

I sogadûs da La Val süga n bel pröm tëmp, fat de gran druch y cun de beles aziuns. Deplö é stades les ocajiuns, mo tröc iadi é le ultim pasaje che ne rōia nia a destinaziun, por fa jì i atacanć sùsc cuntra le portier. In cürt les ocajiuns dl pröm tëmp; Cun n bel cambio de fascia da pêrt de Dorigo rōia Alex E. al limit dl'area y cun na bela trata de girata rōia le pal de püch dlungia la stangia de porta ia. Püch dedô manacia la squadra de Floriani de püch de jì in vantaje. Alex A. abina le pal al limit dl'area y tira sön porta, chësc vëgn devié sön le cé de Romeo, le pal rōia naota sön la stangia de porta y spo é le portier aversar che é bun dl'archité

sõ sòn la linea.

La squadra é bona de stè alta y conzed püch ai avversars, la defenjiun fej bun sò laûr y ciara insciö le plö poscibl de daidè le verda porta Adrian.



Al 35ejim é spo Miki che sbloca le resultat. Le medemo vëgn delizié cun n bel assist de Emanuel y rōia sù cuntra porta, la trata bâsa fej balè la rēi y ti porta le 1 a 0 a La Val. Da recordè é ince ciamò na ocajiun de Max, sòn n bel preparatîv dl atach rōiel sù al limit dl'area mo la bela trata rōia de püch sura porta fora.

Le arbiter sciūra la fin dl pröm tēp, te chisc 45 menüc é la squadra de ciasa che detēia i ritmi. I sogadûs va a palsè sòn le 1 a 0.

Por se assicuré la devēnta ôl ester ciamò n secundo gol. Atira é la squadra che ciarà de fa inant druch por ruvé sön porta. Dô da 15 menüc é indô Miky che fej esulté sù cumpagns adüm a düc i sostenidûs cun n eurogoal, sön n lancio se portel le pal sön le ciantun dl'area y cun na bela trata de forfesc batel le verdaporta; Le pal ti rōia sura le portier ite, naota sön la stangia y spo ia por tera. Adöm a chësc gol é ince n sogadù dl Gais che vëgn desgort dal ciamp cun la cherta cōcena a gauja de na protesta. Al ne passa nia tröp tēmp che ince le Gais se lascia udēi. La squadra avversara devēnta ince prigorosa cun de beles combinaziuns y i atacanc ti sciampa plō iadi ala defenjiun, mo daimprōma sēnza ester dēr prigorusc. Sön na trata dal ciantun é le atacant avversar che abina le pal y la trata di rōia avisa sön la man de Stefan. Le arbiter ne pēns nia sura dui iadi y fischiēia insciō le ònescmetri. Chësc vëgn spo trasformè por le 2 a 1.

Le resultat é indô al prigo mo la luziditè di sogadûs ne da nia dô, al vëgn tignì bun la posiziun y sughé inant. Da alzè fora é na gran ocajiun de Alex E., che é bun de controlè le pal te area avversara, al se gira y tira na bela trata de potēnza, chēsta vëgn de pūch deviada dal portier sura porta fora. Alexander M. apēna ruvé te ciamp ciafa sön le pé n bel pasaje da mezciamp y cun n bel palon

ë

t scavalch

ë

iel le portier, la trata rüva por n pulan dlungia porta ia. Dorigo à ince ciamò la poscibilitè de stlù jō la partida cun na ocajiun d'or, le cros de Alexander é indirizé cuntra sò cé, mo le sogadù superēia le defensur cun na finta y cun n bel palonēt indirizēiel le pal te porta, chësc vëgn ciamò architè sō in extremis dal portier. Le Gais é ciamò prigorûs al'ultim menüt, sön na gran mischia te area ladina é le pal che abina naōta la stangia de porta, chësc vëgn ciamò rebatü n iade cuntra porta de cé mo le portier Adrian archita sō le pal y al vëgn cometü n fal.

Ince sce i sogadûs avversars é un demanco à la squadra de Floriani messü de düt por portè a ciasa i 3 punç. La bela prestaziun ti dà moral positiv ai sogadûs por jì a se sughé le **ritorno dla**

semifinala de Copa Provinzia in mercui ai 7 de mà dales 20:00 sön le ciamp dl Ritten.

La proscima partida de campionat é in dumènia ai 11 de mà dales 16:00 fora de ciassa cuntra le Mühlwald.

Formaziun titolara: Adrian Miribung, Elmar Valentin, Alex Alton, Paolo Vallazza, Werner Sottara, Max Nagler, Stefan Sottara, Alex Elzenbaumer, Micky Frenes, Romeo Rubatscher y Emanuel Dorigo.

Alenadù: Floriani Claudio

Sostituziuns:

Felix Nagler gnü ite imped Alex Elzenbaumer (70^a menüt)

Marco Castlunger gnü ite imped Romeo Rubatscher (75^a menüt)

Alexander Miribung gnü ite imped Micky Frenes (75^a menüt)

Por odëi i resultat dles atres partidas drüca [RESULTAC](#)



